

鉅水齋詩集

餅水齋詩集卷六

大興舒位立齋

疆圉大荒落

二月一日偕王疏雨備兵

朝樞

自燕入黔錄別三首

春來纔一月我去忽萬里萬里亦有春人心不相抵梅花送
我行冷向道旁俟芳草漸有情一路隨行李迢迢風塵中鬱
鬱車馬裏夕漏招蝶眠曉飯先鴉起刀鐙且自看車輪未能
捉借問何所之白雲滿山岵去則爲春糧來則爲負米

拊髀髀有肉買馬馬無骨鐵笛作羽聲吹上關山月月白天
如霜照見金銀闕一箭落旬始使我興飛越平生行路難南
北東西蹶去亦行遲遲急則計咄咄功兼助游覽道頗絕干
謁蓬矢與桑弧誰能坐蕭机可憐杜牧之十里珠簾揭

石生與溫生三復河陽序芙蓉汎綠水矧乃謬相許自從車
班班數錢逢姪女書劒竟從軍春原嘯疇侶五谿接八番天
外多風雨回首黃金臺何處飛鴻羽勸君陽關疊酒盡聞金
縷叱馭有王尊倚馬非阮瑀恩恩唱驪歌閣閣作蠻語

定州

楊柳添聲第幾關清風明月古中山酒家故事誇千口樂府
新腔唱兩鬢數點鴉隨殘照去一鉤草認舊根還春愁正要
逢場寫到處奚囊未肯剛

樂城道上作卻寄張九秀才溥雲

車馬恩東風塵沙怒相語隨風飛上天無萬下紅雨紅雨不
濕人染我春白紵相思一寸灰厥貢五色土雜糅溲勃苓鼻
觀口欲吐蕭蕭短後衣裊裊長柄塵隱隱見孤城匆匆飯亭

午頗憶江鄉春烟水幾枝勝乃知別北梁不若送南浦

杏花

已有杏花開東風昨夜催出門雙眼瞥隔屋一枝纔酒竟誰
家熟春偏此地栽分明鬟上見當作阮娘猜

可惜天涯客三年齷齪中蕭條臣馬白惆悵此花紅深巷吹
簫遠孤邨蠟屐空再遲三四日蝴蝶一叢叢

趙州道上逢雨過憇雨花菴卽事

以風吹塵塵似海以雲作雨雨如水陰晴掌自玉女天雨妾
風姨不敢諉我住下界紅塵迷馬不及狗車雞栖昨日之塵
軟猶土今日之塵爛作泥願晴無風雨不濕或者斜陽及明
月一車兩馬五七言吟入西南出水窟玉女聞言俯而笑晴
雨那能從所好況是燕雲十六州咩田事急吟詩料依然帶

水拖泥行油衣代瓦滑有聲忽露茆菴剛一角恰逢花雨亦
三生布衫七斤重如許菴中雨花菴外雨花卽是雨雨卽花
我來說法逢天女老僧一椀趙州茶鬢絲禪榻恒河沙碧紗
籠裏雨非雨青蓮座上花非花

古常山郡弔蜀漢趙順平侯

同仇可以辨國賊同姓可以辭國色卽此豈是尋常人子龍
不獨膽一身燕南垂趙北際執手而別知此意大震長坂名
小失斜谷利早經百戰上青天直爲三分悲白帝侯如前守
土荊州未必呂蒙櫓侯如後永年陰平未必鄧艾瓊侯今零
落歸山阿某水某邱故里過千秋灑淚誰最多請君視此渾
沱河

隆興寺大佛

入門何爲恠咄咄眼前突兀見此佛丈六金身十倍之大千
世界一塵不見軾旣載僑如循專車尚陋防風骨楚莫敖趾
不足高李洛姬肚無此凸巨毋霸腰凡幾圍徐偃王筋若干
抹王元寶絹作三衣尹吉甫鑊抵一鉢仰視翻疑屋打頭橫
陳但可窗容郗玉井十丈花可拈金剛八尺食可乞旣非肉
眼與凡胎定是銅頭而鐵額豈知枯木倚寒厓再燒幾尊乾
屎橛

內耶鵲山

山因鵲名

占得荒山作故鄉藥囊香墮入詩囊陰陽功補先天缺草木
靈開後死亡一病難醫惟有俗百年太短竟無方相聞風起
蕭蕭處白到先生墓上楊

臨洛驛館偶題

洛水曲相繞其原出遼州奔騰太行麓晝夜無時休我車方
西征此水自東流水豈無情者我行何悠悠古驛暫栖息御
者不肯留驅塵非所願臨淵譬有求不見水中魚但見水中
鷗鷗飛忽驚去沙岸車聲柔

呂翁祠

員海方壺路渺然當時何苦便酣眠三生香火春無主一枕
功名夢有權黃犬東門牽將相紅牙北里唱嬋娟恩恩輸與
樊川杜豆蔻梢頭住十年

宰相紗籠一飯餘秀才文選半飢驅本來富貴原如夢未有
神仙不讀書場屋撫言成脈望洞天眞誥入華胥槐花忙過
榴皮濕賺得英雄證太虛

磁州講武城疑冢行

有手不執五色楮有口不讀九錫文有酒不澆七十二堆壘
纍之疑墳七十二墳盡銷歇黃土無多沉白骨縱然老是鄉
何用狡爲窟君不見銅臺百尺身呼風石椁三年狐拜月可
憐兒女分香時乾啼濕哭長相思朝來欲獻西陵寵未識招
魂第幾家迷樓本自迷疑家亦自疑漢家陵闕日猶冷魏國
山河草不萋或言阿瞞設計愚人耳彌天一棺不在此豈不
知奸骨有時朽奸魄到處褫奈何不礪礪落落以生而寂寂
寞寞以死死不能夢三馬生不能鎖二喬一世之雄一抔土
雖有魂魄何足豪有手願搗礪衡鼓有口願讀陳琳檄有酒
去澆八十萬兵不得生還之赤壁

安陽畫錦堂故址

畫錦堂成歸故鄉仕宦能作邦家光長安居亦大不易豈如

相州畫錦堂我過畫錦堂前路不知畫錦堂何處本無絲竹
恩東山不隨社稷稱南渡季子洛陽雞狗雄翁子會稽負情
儂燒殘丹詔九天上吟老黃花一圓中安陽道上逢殘照重
公之人爲公弔祇知將相是難能誰恤子孫有不肖永叔文
章自可傳君謨波磔更翩翩累他紅錦飛花客老撰南園記
一篇

湯陰謁岳忠武王祠

孝子忠臣地相逢淚滿巾中原留間氣尚論得完人易島三
年志黃龍百戰身英姿豈磨滅俎豆自莘莘

昔作西泠客孤墳拜鄂王今尋東道主故里認祠堂鐵鑄階

前錯銀留井底香老兵堪痛飲絕似蔡中郎

旁塑施全

只解春浮海誰呼夜渡河視天真似夢割地竟無多窗下妻

方燭宮中姪請和可憐三舍日揮斷魯陽戈

載讀公遺集丹心照汗青功名違抗疏文字抵傳經短者英

雄氣愁來筆硯靈滿江紅一曲忼慨不能聽

祠主係忠武後
裔奉祀香火出

忠武文集相贈凡軍中表奏文
移及所作雜文詩詞皆在焉

殷三仁祠

微子作客箕子奴比干心血紅模糊三人行事不相類令我
曠世長嗟吁殷王整谷飲長夜遂賜天下三日酺孟津諸侯
乘醉入鹿臺散財償酒道畢榮望爽功佐命飛廉善走殺海
隅三仁斯時柰何許或生或死風景殊微子懷中抱祭器箕
子口內談洛書比干墓木拱馬鬣雖欲傷心心已無東山祿
父初發難實惟管叔相覬覦頑民不隨九鼎徙義士況使三
軍扶當年心迹信無異後世口實繁有徒朝鮮一舸自縲紲

旌夏一舞空支吾荒祠僂然傍故土
寧知故土爲殷墟老臣不願見此事
回車去式商容間

碧桃曲

爭將殘月唱楊枝瞥過東風賣杏時
三十六天春露重碧桃花底話相思

最關情處易銷魂紅翠霏霏映此門
我是隨藍風裏客看花先感種花恩

浣衣里過嵇侍中祠

東市琴聲二十年司徒題目祕書箋
酒壚幾向黃公醉衣袖仍留碧血湔
此後難尋絲竹譜有人早廢蓼莪篇
侍中還我何相似問訊官蛙一惘然

陳橋驛詠史

兩日摩挲一日紅當年此際太匆匆病龍臺遠名成讖夾馬
營香氣早鍾遂有高文用陶穀竟無佳傳贈韓通可憐夜半
爲天子難守庚申漏點中

渡河

水響一舟虛春風吹鯉魚驅車上土堰破浪出河渠帆影斜
陽外沙聲落雁初祥符城郭近方便幾行書

夷門懷古

市塵車騎兩情通臥榻兵符半夜空六國輸贏歸婦女一關
開閉老英雄頭顱血有酬恩日肝膽交無折節風若鑄黃金
買絲繡西園公子此門中

汴梁尋宋故宮遺址

踏破宮牆萬瓦烟夕陽紅似靖康年欲聽簫鼓空流水更指

榛蕪作弄田彼黍茫茫乾淨土此都渺渺別離天金牀玉几
無消息一角靈光尚宛然

水漸中露殿雨
檻螭吻猶在

當年鏐火下樊樓忍把杭州作汴州橋上鶻啼新法變江邊
馬渡舊京收石欹艮嶽天難補簾颺離宮鬼自鉤一事輓轡
惆悵甚宣和書畫不曾留

洛陽貴紙寫三都爭似千金買諫書報國將軍歸北寺移家
天子占西湖畫船晴雨花深淺絕塞冰霜雁有無此是橋山
弓劒地不堪飲器用頭顱

叢殘史冊小朝廷彈入吳弦不耐聽湖上春寒天水碧帳中
酒熱帝衣青班師怏怏三軍兩攬轡迢迢一使星賸有拳簾
黃袖子相州樓上話飄零

頽橋

今之潁橋古潁谷我思古人潁考叔九原惆悵讀春秋一飯
從容全骨肉計惟掘地聊解嘲力比回天更足豪謫諫差同
漢方朔儼人不類秦茅焦至今潁水清且泚不似黃泉大隧
裏可憐城上取螯弧自古忠臣必孝子

過保安驛作

爲有紅娘子能行白牡丹已聞哀楚些直欲絕秦歡設險中
原地防邊上將壇浮雲能蔽日獨此不遮欄

忽棄三千甲仍傳八百郵兩言執牛耳五等爛羊頭大將無
去病佳人有莫愁蕭娘與呂姥迎送幾時休

此地馬箠數前宵狐火鳴春聲歇朝露燐影亂春星易合真
無賴鴻嗷未忍聽可憐丞不負誰寫抱關銘

驛丞張燦
巷戰死難

襄城見月是夜作家書附題於後

亂鴉選到斜陽樹去向襄城縣中住昔年獵火詠詩人欲覓
遺蹤竟何處韓文公有夜次襄城詩是爲裴晉公行軍司馬時作且攜茆店鐵鐙繁鐙
影徘徊月影明若憶鄜州小兒女誰知今夜宿襄城

王孝子篇

孝子名希曾葉縣人與父渡清潁顛風覆舟同渡者
盡溺孝子從水底負父至岸力盡衝浪死父得免焉
有碑在葉縣西三十里大路旁知縣楊元凱撰記余
秣馬問渡作王孝子篇

清潁從西來流何湯湯南岸北岸乃欲濟而無梁一解無梁
有舟放乎中流以左右望有若風馬牛二解舟小兮人衆風
之來兮潁洞欲去不得去一壺千金上下如夢三解嗟嗟孝
子負父上岸眠父出於泉子入於淵子身雖死父身存無情

者水有情者天

四解

天能死孝子於水而不能死孝子之父

維孝子之故嗟嗟孝子公無渡

五解

過沮溺耦耕處

攬轡登車客澄清何處期畊田人自耦失路數偏奇名姓終難隱津梁亦久疲黃城山下水逝者竟如斯

會水橋漢光武帝廟

橋邊白水真人廟城外青山帝子鄉杖策何人來北道握符從此起南陽兩廊星宿鬚眉古一劒風塵俎豆香熟讀東西兩都賦始知世祖勝高皇

會水道院看花林鍊師煎茶相款漫書其壁

有此清涼境相逢支遁家遲行三里路細數一房花石古懷琴韻甌香咽井華真成殺風景芥壁又烹茶

一春車馬熟塵事厚人顏肯受諸天笑仍偷半日閒過橋剛
聽水去路更看山未忘題名處星軺慣往還院壁有茅庶子
明亭集杜題句
諸天合在藤蘿外性從來水竹居又洪編修稱存與道士
林克敬小篆書一聯與師記作三年別此地能容半日閒兩
先生皆督學經此庶子則
爲余癸卯薦師因寄懷云

午後發新野縣迷路夜行至樊城則雞唱矣

驅車日亭午歧路自東西野色空無著浮雲晚更低亡羊徒
悵悵老馬亦栖栖何處逢茆店涼鐙聞曙雞

臥龍岡作

到此橫拖一道岡茅廬開出古南陽平生交有崔徐在王佐
才非管樂當抱郝終成名士累鞠躬始感受恩長何如決計
招偕隱廡下分明有孟光

談笑巾幇想定軍茫茫玉壘變浮雲其間王者有名世天下

英雄惟使君創業自知難兩立輟畊早已定三分成都八百
林桑樹不及隆中手自耘

一面東風掃艸艚荆襄形勝控成都昏姻失意千金賞兵法
傾心八陣圖受禪壇高終代漢橫江鎖斷年吳不堪白帝
城邊語付與先生六尺孤

象牀寶帳悄無言草得降書又幾番兩表涕零前出塞一公
安樂老稱藩祠官香火三間屋大將星辰五丈原異代蕭條
吾悵望斜陽滿樹暮雲繁

峴山羊太傅祠

將軍閣下碑無字太傅祠前草自春雙淚不如臺上伎一山
愁殺眼中人盛名王衍回頭誤秘計張華斂手頻獨立微吟
整巾帶酌公酒當飲公醉

轉斗灣

舍車理舫榜樂事紛相關低頭看春水舉頭看春山山容既
葑蕀水聲亦潺湲謝累塵土裏得助江山間十里復五里好
景不可刪一日或兩日好事不可攀榜女十三四倚棹雙烟
鬟問訛泊何處云是轉斗灣

舟行望襄郡諸山作

一桁青山青到水水上青山在水底山耶水耶相與浮千里
東風蕩船尾東風吹山山骨瘦水而之山山面皺以水作鏡
山作人雲鬟霧髻梳青春問山何名山不答水水山山自相
接一山分作兩山看兩水環成一水合蒼茫山水萬重重魚
鳥雲沙空復空忽地斜陽挂西嶺浪花開出金芙蓉

石簪村

舵樓花雞啼月黑船娘夢醒桃花國開船滑笏水有聲柔艣
一枝割春色我坐襄陽下水船船自開時我自眠夢遲水急
船搖去昨夜匆匆泊何處依稀記得石簫邨吳頭楚尾銷人
魂他年此地重來覓祇有邨名無夢痕

了髻廟

江邊了髻廟縹緲暮揚舲斜月一梳白烟螺兩岸青夜深山
影重魚響浪花腥未定今宵泊吾方注水經

梁元帝祠

賽社春叢字認梁江陵城外永安坊夢無采女中懷月醉有
徐妃半面妝木偶申情投筆早土囊故事引杯長南朝金粉
飄零盡腸斷湘東一瓣香

更誰回首望臺城下策虛傳討賊名入廟牲牷難供養升天

鱗爪太分明奸雄乘間欺臣節骨肉摧殘藉寇兵留得哀江南一賦暮年蕭瑟庾蘭成

沙市是章華臺故址

昔日楚王臺今日楚人市一如未築臺但有此臺址惟見市中沙日日因風起

曉雨荊州渡江

息壤南門勢渺漫抽帆風雨曉天寬銅鞮曲散襄陽樂玉壘雲橫蜀道難潮打沙聲衝岸急鳥飛山影隔江盤山來青雀黃龍舳何止茫茫感百端

劉表

迢迢帝系圖衮衮鉤黨籍戀戀據方隅悠悠處房室作牧二十年進退無一策養士三千人生死無一客尚遜袁本初豈

激轡孟德同時燕南瓚後世湘東繹矧是豚犬兒去梯亦何
益然而孫仲謀畢竟加九錫

澧州道中

借得漁鐙讀楚辭孤篷便有雨絲絲十年香草天涯夢今夜
重來唱竹枝

暮雲無際楚天低林木蕭蕭響竹雞聽出一聲行不得黃陵
秋色滿湘西

月出空江白玉盤數峰了了青雲端分明一樣山河影難得
才從雨後看

襄陽去此一千五換雇荆船第四回水漸無多船漸小吟成
摺疊侍郎來

夙愛陶公太元記曾題仇氏武陵圖豈知身到秦人洞萬點

桃花一點無

綠蘿山

四十二福地相傳在此間不知青玉笈何處綠蘿山花遠仙
無迹春深客未還竹枝聲宛轉唱徧武陵蠻

舟泊穿石

兩山拱而立一洞明且秀諒非鬼神鑿亦無仙佛守青削天
體圓冷咽泉花溜我船泊洞左所見微洞右隱隱遠人邨塞
裳莫能就虛室候雲歸深潭許月受晴暄一瀑飛空納萬風
吼洞裏旣黃昏洞外仍白晝游基躡甲射七札皆穿透靈媧
開鑪煉五色難補湊作此大光明天地分一竇俗境陋桃源
古蹤闕勾漏我思訪奇書夜夢靈威授三復瑯嬛篇牙牙難

句讀

麻葉狀阻雨三日

山雲夜挂白龍影朝來雨絲如斷綆一尺之雨一丈水撐我
孤舟到山頂魚尋石筍纜孤舟篷背淅淅聲未休隔篷一笑
聞人語昨夜山頭賣酒樓

楚山旣無名楚雨亦無晴夜夜山頭泊朝朝看雨落三朝三
暮見黃牛長年與客同一愁愁說滂沱月離畢今日不出明
日出百丈山頭猿鶴巢千尋江底蛟龍窟

濕帆沉沉愁一束兩槳苔花眠靜綠東船西舫各連檣風水
相遭互相觸風蕭蕭雨淒淒行不得鷓鴣啼鷓鴣不啼天又
暮明日天晴無絳路

清浪灘

一纜萬牛迴舟從水底來谿聲驕作雨人語亂成雷獺嘯青

楓樹龍眠白浪堆思量湖上棹春鏡綠奩開

過清浪灘臧舟謁馬伏波祠

楚國山川漢將營蒼然廟貌感長征玉關死鏃封侯入椒壁
生塗列宿名下澤乘車言有味中流擊楫水無情武陵風月
誰吹笛我是當年爰寄生

龍門灘

萬峰穿虎穴一水抱龍門風長篙無力船危石有痕上游爭
片羽捷徑得孤邨出險真如夢波濤難具論

夜抵白溶

放棹白溶裏迢迢欲問津亂山天外夢惟石水中人側耳聽
風雨低頭託鬼神然犀思一照恐有老魚噴

辰州

城郭全臨水人家卻傍山洞天開二酉戰地入三關節物將
過夏方音逐漸蠻相逢欣撤戍結隊唱刀鐃

時撤戍防禦
鎮守鄉勇

壺頭山弔伏波將軍

將軍南征立銅柱我到將軍銅柱處將軍旣出五谿蠻我亦
憑弔壺頭山嗚呼將軍今老矣長者家兒怒不止明珠薏苡
無時無千山萬水將軍死將軍之死長太息生據馬鞍死馬
革招魂一曲武谿深嗟哉武谿多毒淫將軍莫怨武谿瘴武
谿今有將軍像將軍血食壺頭山絕勝雲臺四七將君不聞
山前山後千灘聲都爲將軍鳴不平

溱浦江

溱浦江邊船泊時丹山碧水

石壁鐫此四字

可題詩依稀此景吾曾

見三丈鵝谿黃大癡

黃獅灘

灘險說黃獅孤舟欲上時點頭逢石丈揮手送篙師賦命雖然薄行歌未肯遲馮夷如解聽一浪一篇詩

再上黃獅灘作

我聞弱水西縹緲三神山不愁船不到但愁到輒風引還風引還不可攀一海外一人間人間何處行路難請君再上黃獅灘黃獅灘高高於樓上屋水聲如霆水勢如瀑舟從水踵到水頂黃獅眈眈怒以日長繩繫灘石巨杙楸灘岸一步一相呼才及灘之半驀然一落千丈強人聲水聲無宮商紙錢祀神風力駛摩挲者三鐵鹿子斷布猶堪三日徇夾舟終遣雙蛟死呼蒼兕驂翠虬渡香象歌黃牛騎鼉掣鯨碧海流平生豪氣橫九秋忽聞河東一聲吼驚走談空說有拄杖之龍

耶吁嗟獬鋒不可犯孫郎容貌暫公膽

洪江洞庭宮作

金釵叩樹玉璫熏一點靈犀翠浪分昔日書生來北渚至今
帝子望南雲神弦曲奏紅絲瑟龍女花開白練裙手折芙蓉
吟別傳洞庭宮拜洞庭君

竹滲夜泊聞杜鵑

問鳥家何處聲聲勸我歸天涯同作客夜半忽沾衣竹暗水
無影山深雲自飛杜陵詩思苦得句不能肥
不如歸去好歸去亦無田淚比湘江竹聲非蜀國弦可憐鵲
三匝何處燕雙眠從此泊舟處先尋無杜鵑

沅州書所見

長橋一里臥晴虹虹背人家兩岸通絕似秀州門裏見樓窗

開在水當中

繚垣一帶掩雙扉也有輕黃蛺蝶飛
碧杜紅蘅無處覓一鉤
新刺野薔薇

玉屏山看晚霞

水上屏山山下池暮雲樓閣映參差
中間一抹紅霞影小李
丹青小謝詩

青谿

小縣天南近輕舟拍拍來城依山勢轉
花聽水聲開古道
人烟少微波鷗鷺猜難尋雲客宅石壁綠封苔

雞鳴關

眼前何突兀欲唱小重山掩映黃茆屋
周遭碧玉環可憐飛
鳥外何事馬蹄問客豈狐裘者平明出近關

吉祥寺弔甘尚書作

公諱文焜遼東人康熙十二年爲雲貴總督吳三桂反公致書貴州提督李本深慷慨數千言約共櫟禦而本深以安順應賊公知貴陽不可守時總督駐貴陽遂馳下鎮遠殺其妾以饗士冀招楚兵扼隘而副將姜義先已從賊諸營響應公知事不可爲乃自縊於吉祥寺事聞贈兵部尚書 賜謚忠果

碧血萋萋草又生吉祥山下想南征稱王莊蹻終無賴殺妾張巡更有情白練至今飛破寺蠟丸空憶下孤城令威歸去遼東鶴一杵霜鐘萬里清

登青龍巖絕頂憩觀音閣遂至妙場

危峰刺雲雲壓峰一峰遊戲如一龍宛然上下相角逐山青

雲白無人蹤阮公著屐知幾兩忍對好山坐惆悵捫蘿突兀
上龍背亂石之而屹相向再從龍腹游陰洞穿覆盎低迎百
草滑於苔暗瀉一泉聽作浪轉尋林薄得小橋盡棄龍爪排
龍腰青泥盤盤不知凡幾曲山花山鳥向我紛招邀有僧絕
頂聞剝啄招客開門上龍角飛來香雨梵王宮三十三天無
一握斜陽脈脈雷殷殷既絕徑路通風雲低睂欲參觀自在
一鱗一甲皆前因卽今乘興題詩路山下烟霞山上霧親向
龍沙八百來無人知道恒河數

相見坡

南山北山中央谿行人隔霧相招攜對影聞聲忽相見來者
自東去者西飛梁庚庚橫紫霓地地矗立天天低上爲星辰
下爲石左顧右盼空所翳初攀孤藤臂使指再躡絕磴膝及

臍山風卷裳烏無迹置身已在青雲梯君不見黃金絡馬頭
白鐵鑄馬蹄到此躊躇不敢騎青鞵布襪行栖栖我歌君聽
淒以迷一肩壓瘦詩囊奚

施秉道中

覓得雲根五漏泉宮商一部意冷然水經箋注茶經帖恨不
攜來此處煎

梔子花開四面風山坳蝴蝶草根蟲無人解贈同心者亂插
紅藤笠子中

沙坪西去是偏橋幾縷炊烟接市梢今夜定尋山店宿夢魂
猶趁木蘭橈

華嚴洞

陰壑闕莊嚴端坐石大士旁列阿羅漢面目各宛爾鬼斧所

鑿修山靈不敢齒想當說法時頑者點頭是采入轉窈窕仄
徑容尺咫流泉淙有聲兩屐於是止假設略徇游異境探更
駛天公慳幽尋所獻僅有此

天梯行

層巘陟晴旦浮光盪朝霞丹梯三百級縹緲迴雲車昔聞地
去天俯仰九萬里睥眄不能階羽翰凌風靡又傳河源客親
見當窗織乘杳暮歸來取得支機石二說雜信疑忽見上天
梯權奇策天馬膈膊聞天雞徑此盤旋上天際真人想一點
高一層開門談蕩蕩碧落接太虛中有紅雲居初投蓮花驍
玉女粲挪揄問君從何來茗亭黃金臺身無神仙骨安能窮
九垓西望蓬萊島靈藥多於草讀罷山海經不見三青鳥石
棧相鉤連行行夢遊仙蒼蠅笑下土一瞬三千年

七里衝

黃平道上山四壁遠近高低萬堆石當年豈有愚公移此境
渾疑巨靈擘橫看成嶺側成峰陰慘陽舒天氣隔山頭風雨
山脚晴晴山蒼蒼雨山白筍將而來七里衝居民猶話楊應
龍二十七營何處是雄龍雌鳳空山空楊應龍妻田
雌鳳尤妖猛梅花鼓
角山城西郭客到城門日銜閣莫指宜娘舊日屯將軍昨夜
旄頭落

飛雲洞作

白石三生話青霞萬里心偶聽流水暗不覺入山深佛坐玲
瓏岸花飛窈窕林因過月潭寺空翠濕衣襟

重安江雨渡

重安江口綠烟生飯訖江頭打漿迎著一漁蓑渡江去果然

三日雨無晴

天無三日晴地無三里平黔諺

老君關

江上萬重山山高水更潺忽停孤客棹直上老君關石滑斜
通騎林深濕坐鵬稍聞雲霧裏樵子唱歌還

墜馬石歌

墜馬石者明巡撫都御史姚啟盛行部憫夫役之勞
屏輿乘馬而行此其墜馬處也土人銘公之德於石
以爲遺愛在楊老驛官路傍

墜馬石雞場路大書深刻墜馬字云是前明黔撫姚公墜馬
處黔山高役者勞上山復下山跬步俯仰如桔槔公爲民牧
愛民力騎馬登山墮山石噫嘻馬足尚難停何況肩承踵接
重行行君不見驅五丁鳴八驢坐者樂行者愁石頭路滑風

雨秋燕然之銘無人修墜馬石心悠悠

黃絲驛題壁

一宿黃絲驛荒邨絕市喧山虛孤月朗天近衆星繁曾酒酌
深夕疎鐙搖斷垣他鄉情緒劣不必有啼猿

鳳凰石

鳳凰山上石勢作鳳凰飛修竹環青峭孤桐引翠微秦鸞朝
又暮湘燕是耶非卻借浮雲白飄飄作羽衣

冠山寺

龍里東門路崎嶇復幾盤寺荒傳法少山僻得名難貝葉翻
茆屋松花埽石壇蒼烟來暮色雙屐悵盤桓

抵貴陽日作

禪心常羨義舟師一錫天南住幾時客久漸忘行路遠夢回

稍覺到家遲未愁海上秋風起先寄山中夜雨詩十萬炊烟吟徧了今朝親到武侯祠

黔靈山色翠烟堆樓殿參差入望佳跋扈將軍曾駐節風流

太守與磨崖

石阡太守陳奕禧擘窠書黔靈勝境四字

皆藏積溜黏迎屐松卷天

風響墮釵恨不愚公移此去青山雖好是天涯

七日山程自摒當年烟景寫遐荒銀環夾路逢春女銅鼓傳家賽夜郎雨後光陰巒箐合風前滋味野花香舊遊若寄韋江夏那得新詩爾許長

百蠻風俗接三苗紅暈檳榔綠暈蕉濟火祠前烟漠漠奢香

驛底路迢迢蘆笙吹月花如霧茆屋臨谿樹當橋絕代輞軒

誰采得岑山孖水亦風謠

苗以山之高者爲岑水分流曰孖

甲秀樓諸葛武侯祠

若不南征竟東走蜀道雖難不可守侯豈真無應變才黃雀
螳螂顧其後後身未必是韋皋前身何意逢陳壽讀書三歎
心激昂忽拜丞相之祠堂當時五月渡瀘水何異三年伐鬼
方七擒七縱非遊戲要使南人知此意南人懷德兼畏威長
戈利刃何當揮遂收四十有八部巾扇無聲千羽舞但見壯
士銷金甲邨民賽銅鼓侯才勝響寧十倍侯祀留黔自千古
牂柯酋帥濟火兒壺漿簞食迎西師至今配食侯廟側青囊
藤甲裹束奇彼酋生不識文字矧又言語多支離乃能從侯
出險阻拓境直至西南夷陰平之險豈止此恨無濟火相羈
縻嗚呼恨無濟火相羈縻咄咄艾艾何期期

陽明書院懷古

白簡劾蠶室青鞵謫龍場遐陬鮮宦跡以公爲輝光昔聞叱

馭來當道多豺狼賢愚非一致身世忽兩忘仙亦無有笈佛
亦無有航粹然儒者言知能皆天良公本第一流功名爛無
伍逆奄憎若蠅強藩縛其虎完人得忠孝絕技綜文武豈知
始基之乃在遷謫所洞天有陽明書院仍其名徘徊不忍去
萬歲千秋情公生既爲英沒則自有靈公不坐而言起亦自
可行將共天下寶詎談紙上兵始知講學事無與公重輕朱
陸有同異陽明亦流弊且愁讀書多於世工趨避試問閩古
泉何與武夷山著草從此留諫草從此刪

清鎮道中卽事

香鑪峰下雨瘦馬不曾停樹裏柳烟綠山中石氣青書從鴻
雁寄詩許鷓鴣聽巖戶無人迹閒雲晚自扃

石版房

黃岡記竹樓小戎歌板屋牽蘿洵有情誅茆亦不俗客行到
安莊石片滿山麓鋪爲石版房請君此中宿听然笑入門秋
氣何鑿鑿石窗窈窕開石壁周遭築牀頭蟋蟀鳴梁上苔花
綠我非石腸人吟爲石城曲問石石不言璞被弄寒玉夢見
黃石公素書於此讀

萬金買名園千金構廣廈三年石椁成笑殺桓司馬始知金
屋高不及石房雅況補造化功風雨不敢打短衣夜射虎飲
羽南山下倘勒燕然銘四壁皆可寫土人論三生居處不能
捨深宵勸行客小住亦云且雖無簷兩重差勝茆一把不知
人世間霜壓鴛鴦瓦

龍井

在安順郡
嶺山下

珍珠一斛買傾城未抵盧仝七椀情禪榻茶烟何處颺在山

泉水本來清碧波橋下春如瀉藥玉船來酒共傾拋得杭州
未能去枯腸長觸井甍名

自安順赴鎮寧黔路之平者止此六十里

歷阻得夷塗耳目曠無礙清沙翠竹中人馬各自在天公久
好奇至此意頗悔設險知昨非履坦當晚蓋驅除四面山山
勢盡謙退野并藉作茵芳草積如黛微風生其間色相空所
對如久夢忽醒亦少見多惟回首睇層巒烟雲互向背絢爛
歸平淡悟入文章界鴉飛聲啞啞暝色肅歸隊城角露紅鐙
一州如斗大

關嶺

不見一鳥飛但聞萬馬響四十有三盤一盤一千丈登峰竟
造顛始願所不想顛瞰下諸山諸山向我仰短衣吹落葉風

片大於掌穆駿尚徘徊手捫青天蕩解鞍憩古廟目眩魂悄
恍惚忘人腹飢熱聽馬蹄癢試問此來遊畢竟誰所強白雲
太行麓余豈昧前往願頌金諫花與山同長養

漢將軍關索廟下作

廟在嶺絕頂嶺從將軍姓也碑稱將軍爲前將軍之
子當武鄉侯征南蠻時將軍先驅至此遂俎豆焉余
按臨沮之役前將軍父子殉難而將軍又史失其名
黔書所辨良是然廟貌颯爽民奉其祀奇績所昭不
可以不作也

易道青天上將軍百戰來赤心先世業白面少年才史闕千
秋恨山空一廟開書生慚橐筆不記舊雲臺

白水橋月夜

得月客夜行月照夜行客行過白水橋水月一時白

望水亭瀑布歌

天孫織錦愁復愁當窗軋軋逢牽牛停梭一晒秋水澗聞聲
對影私綢繆不知何人訴天帝帝怒倒決銀河流浪花破蕊
開頃刻冰飛雪駭無停留乘查之客疾歸去西池王母驚防
秋南來烏鵲相拍浮三十六隻芙蓉鷗是時其工氏以頭觸
不周處妃手抱一卷石欲塞五城十二樓至今涓涓滴滴泐
秋雨雖有瓊斤璧鑿難補修秦王開山五丁死漏出一綫如
鴻溝溝水東西劃江海餘支散入西南州州人不知天水碧
喚作瀑布真奇絕耳如乖龍翻急雨目如飛仙弄華雪又如
千軍萬馬中白戰何曾持寸鐵層層兜羅綿屑屑真珠簾行
來夜郎國讀破秋水篇來牛去馬渺何處老魚瘦蛟噤不前

雖有白玉京爛銀峰水精之宮琉璃之屏風有此色皎潔無
此聲硃礮長橋蜿蜒微徑通山聲水色天濛濛孤亭一角聳
而立使我目千里窮耳三日聾開拓萬古之心胸筆亦不能
繪聲聲亦聾無始終彷彿關西大漢唱江東化爲千百億萬
右手亂撥琵琶銅可惜奇境落天外奇語橫胸中李仙謝賊
搽牢不及到坐令佳廬天都龍湫雁宕一一欺英雄題詩上
馬掩耳走蕭蕭萬籟無人蹤

盤江

且蘭江上小徘徊江水年年漲一回纔送楸船莊躑去又迎
麾扇武侯來

鐵鎖橫江替畫橈綠碑殘蘚詔前朝摩挲直上金鰲背二百

年前舊板橋

盤江鐵索橋明布政使朱家民所建並換碑記
朱又嘗於橋成日賦詩有云人從屈氣樓中過

我在金鰲
背上看

雨行安南道中

南來行盡萬山阿
葉葉秋風怨綺羅
啼殺鶉鳩聲似水
晴雲山下雨雲多

濃烟潑墨霧籠鬟
百首新詩濕未刪
一角青天鋪作紙
分明題到米家山

羊場月夜宿吳都勻太守戎帳作

射虎百蠻中
椎牛萬竈下
紅鐙搖廣烟
翠帳支修架
四角雲衙衙
兩頭月霸霸
臥唱從軍行
吹笳碧山夜

南籠凱歌三臺

嘉慶二年春正月貴州狝苗韋朝元綽號七綰鬚妖
婦王囊仙舉兵反朝元據當丈囊仙據洞洒各擁苗

卒十餘萬焚掠諸州縣堡塞進犯南籠府城

上命雲貴總督勒保率師討之自安順至普坪轉戰五百餘里閏六月解郡圍賊退守巢穴數挑戰不利我兵乘勝夾擊屢有斬獲八月十五夜分兵八道環攻之賊衆宵潰總兵官施縉遊擊王宏信生擒兩逆還營檻車送京師露布以聞南籠平某從征幕府謹獻凱歌三臺體詩四首若其平定方略當纂載史館以紀膚功某文辭舛陋未敢及焉

四野蕭條堅壁三軍慷慨乘闔蓋民望之若歲亦兵至之如神
右解圍

耳聽鉤輈格磔眼看撲朔迷離搏兔亦用全力牽牟何處雙飛
右擒渠

彼三戰而三北我七縱而七禽一騎奏功露布五弦解慍風
琴右奏捷

六月元戎十乘七旬干羽兩階上方錫爵無算諸將論功有
差右策勳

苦雨

可惟催詩雨朝朝暮暮添居然千首濕不唱兩頭纖撥火香
初冷眠秋夢亦黏高歌洗兵馬開硯翠沾沾

南籠軍營得沈小如武邑中秋書卻寄

白馬三軍去青禽萬里來陽關慳折柳隴首健封梅感舊心
如寫熏香手自開秋風桂之樹想見隔鎗裁

四十商瞿恨書來忽輟然得男三索後買妾十年前
戊申小
如買春
亦平視帖寫塵甯誤門藏鳳可傳河陽花滿樹爭似綠陰圓

武邑分疆僻文翁從政優此才非百里餘事亦千秋刻燭紅
催韻彈琴翠欲流贈君循吏傳絕勝遠封侯

讀破銷魂賦天涯海角行鬢絲空自颺髀肉不曾生劒氣雌
雄語饒歌上下成書生無骨相卽此是功名

若問西南事知君笑欲瑤地遙天較近人少石偏多瘴癘秋

霜殺

去黔瘴過霜降卽止

昏烟夜月歌

苗俗皆跳月而合男女

參軍聽蠻語不

解意云何

王粲從軍樂吳均行路難勞薪故車脚春夢大刀鐙笛譜飛
三弄弓衣繡百蠻歸來逢沈約一卷權名山

奢香驛

消磨瘴癘翦蒿萊九驛龍場一線開山海經中三鳥去女王
國裏五丁來朝天巾幗歸皇極略地兜鍪失將才今日鳥蒙

騎馬路野花紅殺亂山堆

小除日在興義作家書附寄女牀山人

織徧弓衣數酒籌消磨獵旦與觥秋三年皮骨杜工部一檄
頭風袁豫州自感將軍容揖客浪傳夫婿覓封侯分明絕域
從征者到此依然筆未投

江紅海綠感韶華來往楊花又雪花萬寵貔貅前出塞一牀
蝴蝶夜還家饒吹曲裏妃豨競鏡聽詞邊客燕斜卻笑書催
濃墨字似卿雙鬢亂堆鴉

犍爲東鄙舊邊城勝帖家家寫太平鄉信便隨春信去軍功
恰與歲功成一年作客渾無賴今夜題詩倍有情此地花開
時較早放牛歸馬聽啼鶯

夏葛冬裘歲屢遷越禽代馬性難便別期已醒中山酒歸興

多隨下水船
靄靄慈雲春
一朵濛濛零雨話
三年相逢莫訝
囊羞澀詩價
騰昂壓兩肩

么妹詩

水西土千總
龍躍其先以從討
吳三桂有功世襲斯
職狎苗之畔
幕府檄調領土兵來赴
適躍臥疾懼逗
撓乃遣其么妹率屯練
二百人馳詣軍門從征
前後凡二十餘戰禽馘最夥
歲除歲事賞以牛酒銀牌令
還本寨而加躍軍功一級
妹年十有八歲形貌長白
結束上馬出沒矢石間
指揮如意亦絕徼之奇兵也
時王備兵留後興義屬不佞爲詩送之以焜耀其歸
因有是作凡苗以行第最稚者爲么云

健婦猶當勝丈夫
雍容小字彼尤姝
然脂暝寫蔣三妹歌血

請行唐四姑上馬一雙金齒屐乘鸞十八玉腰奴不須更結
鴛鴦隊白練裙開筆陣圖

迷離撲朔辨雄雌千里明駝古有之軍令靜原同處子兵符
端合付如姬修來胥史功臣表繡入弓衣幼婦詞石碣兜鍪
雲髯鬢不知巾幘定遺誰

餅水齋詩集卷六

餅水齋詩集卷七

大興舒位立人

著雍敦牂

詠疏雨觀察聽事前所察三鸚鵡

鸚鵡來南詔年年憶故園乍歌三婦豔似聽五禽言香稻山
雞笑驚雷幕燕糊方音萬里路賸欲采輶軒

賴是心無事擡頭不避君清談愛名士蠻語笑參軍毛羽終
爲累樊籠尙有羣窗雞與欄鴨飲啄自紛紛

郡齋始春桃花盛開

花開纔過試鐙風借得鐙花一色紅多謝東君難忍俊青春
先到細腰宮

那消羯鼓苦相催閒處飄零冷處開略似江鄉修禊後綠萍

堆裏酒船來

十日春寒一日晴
隔牆惟見此花明
深山那有閒蜂蝶
雨雨風風別有情

屋角嫣然又一枝
花神好好要題詩
浣花箋紙偷春格
寫寄江梅尙覺遲

午陰市院懶猶眠
孤負紅妝又半天
便合移他水精枕
淺蓬萊下小遊仙

教子圖詩爲程任齋太守

卓梁作

金管書蕭繹青鐙
讀范滂十年通籍
早一卷畫圖長佳
入詞場話慈開宦
海航願持春酒綠
曼壽詠高堂

先生來捧檄直到
夜郎西乍看飛鳧
下能將戰馬騎功
強文苑傳恩重武
都泥敢謝簷言小
然脂手自題

任齋太守出示軍行諸詠因題其後

響拓弓弦霹靂聲梅花瘴老請長纓三驅不誠前禽失一檄
居然下馬成餘事尙能開筆陣偏師難與撼詩城相看我亦
羊公鶴如此矇矓大笑生

太守與余同出前曹帥
陽湖管松厓先生門下

藏書歎

爲李他山拔萃

瓊英

作也南郡無書獨他山家祕有

積卷三苗之難存什一於千百余從征幕府恒向他
山借觀聽述顛末歛歔有言

小年三食紅蟬魚夢騎蝴蝶讀祕書雄雞一聲忽掩卷恨無
記事雙明珠弱冠羣書頗卓犖易帽黃塵恩科目枉拋心力
畫牡丹空谷烟蘿看不足自從珥璫仍翱翔東西南北皆異
鄉一肩古錦有時棄矧此車後塵垢囊乃知讀書具有數惆

恨年年遠行路山水難將恩怨分文章已被飢寒誤戎車六月援孤城蕭郎白馬從軍行一丁豈不敵兩石夜闌背誦陰符經稍喜秋聲競笳曲瞥見東風吹草綠相逢幕府羽檄閒便得從君借書讀君言家住城北門舊有牙籤三萬軸弄藏何止數十載寒非羅綺飢非肉無端搆難出槃瓠烽火春宵失茆屋當時清俸買來多劫後之灰無一剎我聞此語欲涕流青鐙風雨懷千秋經者三墳及五典緯者八索及九邱殘膏賸馥合餘燼什一千百嗟存留自來文明象離火斯實天意非人謀君不見羽林香兔園冊煤尾蛛絲若干尺不如筆硯一齊焚死灰焦土無人識

綠海子修禊作

東風綠海子騎馬似乘船脫劍逢諸將流觴擬昔賢波恬魚

策策春遠草芊芊較勝山陰渚樽開得管弦

十八先生墓

明桂王子由榔自粵竄黔僞督師孫可望待無人臣
禮從臣吳貞毓等謀誅可望事洩被誣害其家人併
瘞之在今興義府西關外馬場稱十八先生墓春秋
有祀十八先生者大學士吳貞毓太僕少卿趙廣禹
給事中徐樞御史林鍾周允吉朱議臬員外郎蔡縝
林青陽蔣乾昌任斗墟主事胡士瑞張鐫朱東旦易
士佳李元開都督鄭允元司禮太監張福祿全爲國
貌諸孤蓐爾國天荒荒地窄窄可憐蟲亾賴賊十八人罹此
厄計雖非氣自直同日死異代惜田橫島孟嘗客彼三千此
五百黃土黃碧血碧秋風楊春雨麥我從軍弔遺跡短歌行

長太息

從他山借閱指月錄臨別送還卽書冊尾

誰知感慨悲歌士來作郎君子弟禪萬里相逢皆定數一紙
得借亦前緣埋頭鑽紙癡於夢遮眼看經去似烟掩卷題詩
倍惆悵太平世界別離天

又題元白長慶集後

誰識香山絕妙詞女歌姬解伎彈絲再除一箇雞林相肯把
黃金買白詩

元九才情遜樂天夢遊春山太纏綿白頭宮女閒能說何必
連昌又一篇

兩頭纖纖

兩頭纖纖筆公弼半黑半白阮公籍膈膈膊劉越右磊磊

落落嚮孟德

古詩四十韻贈郭念士

我觀世所重仕宦躋顯要其次冠儒冠撫拾供吟嘯鄉黨有
布衣屏不作同調一旦事緩急各各舛相弔試問十二牛秦
師誰所犒讀破未燒書幾爲商賈笑南籠有義人雲龍而霧
豹四座且勿喧聽我前致導郭姓懷仁名念士其自號家居
城北門素業習畊釣稍積所贏貲市逐什一耗雖未免鄉人
在鄉名則邵其不善者惡而其善者好去年三苗叛孤城中
飛礮堅守春徂夏彫氓感遺噍念士散其財念士助其糶城
中一切事實惟念士劬援師克普坪羣醜撲原燎

普坪在南
籠城北三

十里先爲
苗子所據

艱難捍禦功元戎以疏報

至尊顧嘉歎改郡奉明詔好義則民興君子是則倣榮名

何奕奕

殊施亦浩浩

威勤侯既解郡圍以狀聞詔改南

士民念士與焉奉準吏部

議覆叙功得給六品職銜念士不簪纓念士不學校乃述其

所爲二者不能到嗟彼浮靡徒空談妙有效見義忽無勇指

瑕仍自蹈或生鄙吝心秦越視肥磽或生懼怯心弩末不穿

縞且有最黠者藉此營爲盜種種諸變相秦鏡不可照孰有

如念士始終絕戀嫕我贈念士詩不識念士貌吾友李他山

嘗以此事告他山不妄言所譽信非冒薦賢當上賞殺賊正

年少草以風識勁樹以雪辨操士生天地間必無僞忠孝茲

事既可傳斯人亦惟肖勉哉守元北行矣飛黃鵬借君仗義

名助我吟詩料

卻寄陳鵬判官

芭蕉關外路難得手重攜雨雪新鴻爪風塵舊馬蹄十年殊

出處一水又東西還有何戲否匆匆唱柳稊

無蠻有監州人愁我始愁浮名循吏傳情話少年遊酒熱花生樹春殘笛倚樓陳遵尺牘好珍重寄銀鉤

燐祭行

散如高峰之放螢聚如大海之浮萍低如草閒之撲蜨遠如天際之墜星其聲咄咄其光熒熒其色或綠或白或縹青又如露翻荷蓋以淠瀼風吹柳綿之飄零鳳帚埽玉豆犀帶攢銀釘下迷地戶上天庭嘍火簇簇花冥冥是時月黑葉落十五蕤雲帷霧屋山簾篲鬼車嘯過紅杉廳麥飯一盂水一餅老僧點鐙來誦經撐霆泣雨不可以悉聽閃者鬼眼碧冷者鬼手髯新鬼舊鬼相掣粵山魃虎偃立因屏老僧牢坐雙臂瞑左鏡右鼓中搖鈴始言慘澹中言慷慨終焉丁甯骨則有

時而朽魄則有時而化所不可泯滅者惟此國殤點點哀伶
仃君不見閣可畫像山可勒銘殺賊而爲厲成神而爲靈七
尺之軀一尺面生爲三軍死爲五丁將軍戰馬野花紫愁城
萬雉寒不扁此時空閨夢未醒黃鶯白馬春怱怱況乃人壽
幾何年齒齡長平無寸鏃赤壁無隻舸佳城不重貨布陰房
不攜娉婷泥犁羅刹不稱幙與綖衣不煖千金裘食不饜五
侯鯖泰山鴻毛今古一邱貉曷爲鬱塞自苦有類螺贏螟蛉
紙錢索索郵膠泠泠去此鐵圍山外十萬八千又奇里中有
極樂世界度諸苦厄負無垠厲聲一咒萬響停人頭馬蹄略
具形若飛灰若墮翎石犖确等瓏玲去來倏忽不知誰使令
風毛雨血鎧花腥

草短短

草短短牛緩緩牧童騎牛髮纂纂騎牛唱歌歌聲愁有田不
畊傷我牛問渠不得畊田故去年田爲戰場路去年有田不
得畊今年畊田春雨晴山泥匪石牛礪角況無穀種何以生
語童勿憂休唱曲官給爾種播百穀一月城中官振粥

他山讀先祖詩愛雞鳴桃花卹句書來論訊作此答之

春山行役采芳蓀雞鳴花開記此卹祖德互從千里述詩情
遙向百年論簪裾蓋處雲雙闕衣鉢傳來雪一門先祖檢討
王辰通籍他山令祖侍御十虛公則於戊戌入翰林
雖於詞館爲前後輩而實同出武進趙恭毅公門下鸞鳳本
枝牛馬走風流文采悵無存

寄懷他山

小海采蘭三月大道折楊一枝我是江南紅豆逢人便說相
思

新聲子夜讀曲宿雨花朝洗春忽作浮萍兩點又撒香菱一巡

南詔羽書初罷西園裙屐齊來只此便堪圖畫何須寫向雲臺

不恨相逢遲暮只愁相別匆忙從此天涯海角他山何處他鄉

喫茶可至七椀借書時復一編寄語阿三他山之僮勞苦如今帖

席眠時

往與他山談必夜深此僮侍給使令不倦

臥聞蟋蟀偶成

夜夢旣闌人語絕一箇秋蟲初切切須臾同聲一蟲應牆北牆南相掉舌兩蟲各據一牆根若斷若續無休歇我雖不辨蟲所云在蟲自聽當有說譬如爾我競談論蟲若聞之亦不

決又思方言人人殊中原傖父南蠻馱何此蟲聲清且幽如
是世閒了無別十年枉自注蟲魚反覆尋維媿格物參軍聊
解蠻府嘲詩人最憶幽風節爲渠一一記稱名更僕數之頗
瑣屑或爲莎雞或促織曰蛩曰螢又蜻蛉絡緯啼來懶婦驚
鴛鴦飛去王孫別不知誰造此等名今昔相傳互羅列亦如
吾儕名字外山人居士紛標揭此時蟲聲漸近階自牖而帷
而枕徹靜思凡物有本性蟻愛趨蠅蠅好熱茲蟲獨結清淨
緣每向秋宵自鳴咽傳去三生玉女言記來四句金剛偈初
聽彼此似相呼再聽往還似相詰千聽萬聽逼耳根但覺有
聲皆蟋蟀忽然遠唱一聲雞四角悄然若樂闕憶得此時青
粉牆霜花一寸開如雪

中元節夕觀音寺看放河鐙歌程任齋太守屬賦

城南秋水環碧螺上有三層牽堵波四山旣暝月魄伏看放
河鐙鐙滿河城中士女來婆娑我亦相逐鄉人儺蜿蜒燭龍
銜尾出熠燿螢火瞥眼過軋軋織作錦萬梭簇簇開出花一
窩浮沉曲直隨盤渦千鐙一光水面酡此時西風卷銅鏡略
有細浪紋吹韉若以蠟代薪瑤簦鬱嵯峨若以犀然渚驚起
蛟鼉鼉長橋臥虹石闌亞人影較似鐙光多孟蘭之會七月
半譬若五日哀汨羅比於試鐙事則異倣自流觴笑欲嗟任
所說魚山清梵遠可聽雜以絲竹鐘磬鑼香鐙中供觀自在一
神手杵其韋馱云何欲度諸苦厄楊枝灑露甘於醯藕絲袈
裟無等咒彷彿餓鬼來嗟嗟我聞地獄一十八漆城蕩蕩棲
陰魔銀花火樹忽照見能使大地光明俄僧言功德此無量
黃泉黑海開青荷況復連年苦征戰往往鬼嘯聞牂柯安得

列炬千百億燦若晞髮陽之阿
犍爲太守彈兩指勸我且作
河鐙歌歌成鐙炮一刹那城門
畫鼓兩手援烟波不動天影
碧繁星點點如張羅

憎蚊

惟蚊肅隊來三三或兩兩所須
諒無多頗不關痛癢未靳果
腹去幸毋逼耳響奈何聚成雷
已秋猶搆黨棘蠅晝乍驅池
蛙夕難賞爾蚊信無譁噬膚
許默饗償爾溫飽志留我清靜
想擲揄豈不能吾亦愛吾掌

銅鼓詩

望之鐵色質則銅被以鼓名聲
乃鐘面如塵鏡冷不鎔底如
覆釜其音楚中央一束黃腰蜂
土花戰血相淡濃上有文字
如雲龍手三摩挲不可蹤我隨
車騎來南籠此鼓獻自畊田

傭問渠鑄鼓何所宗云是諸葛征蠻兇渡瀘五月濟火從功
成昇錫羅甸封歲時伏臘事吉凶椎牛醢酒宴萬峰乃以此
鼓代鼗鏞青山白雨雙杖筇小叩小鳴初鑿鑿大叩大鳴旣
逢逢天空谷應聲隆隆諸苗拜舞衣無縫罷宴藏鼓無敢縱
千載風俗茲益恭憶昨巨虛負蛩蛩鼓鼙將帥思三冬今者
戍鼓罷不撻催花羯鼓聲玲瓏請留此鼓鎮邊壩笳業丹腹
懸維樅雖殊石鼓賦車攻頗倣土鼓追黃農金人十二銷鏞
鋒并勒我詩當紀庸而我再衰三則慵雷門之布綦難容

八月十五夜鳴玉山房觴月

初八看秋月青天如挂磬十五看秋月青山如對鏡作客夜
郎遙感時秋士稱酒從此處賒期已昨宵訂傍晚出城隅月
上衆山靜山房敞八窗石闌干且凭大兒北海豪老子南樓

興若畫主客圖可畫不可贈斯時仰天笑天送月出竟空無
半雲遮遠有兩星睺玉宇瓊樓中了了可指證因秋之佳氣
見月之本性此景旣難逢此遊應最勝迥然發嘯歌山壑爲
我應更俯下迴谿澄澄一盤映有如碧玻璃濕銀沃之瑩山
月靜可觀水月動可聽山月與水月動靜不相競悟理在須
臾須臾夜已定花垂露暗滋襟起風知勁杯盤旣狼藉縹緲
尋歸徑攜月入城來城外秋皆賸

黔俗以試院丹筆寫魁星相餉遺云避不若會疏雨觀
察有事棘圍旣撤扁儻從輩攜數幅出求者踵至粲爲
是詩

天上文星斗第四石不能言不識字未知色相何依憑競道
文章若遊戲右手執筆左斗杓吁此權柄毋敢撓朱衣點首

依稀是絳蠟燒心第幾條金
筑秋風開試院一紙功名持贈
遍彤管點成炯炯眸丹砂塗出
團團面不愁薄命畫葫蘆施
朱太赤紅顏龕傳來鏡下郎君
語寫竝山南進士圖丹篆三
重文煒煒中列巡撫關防篆爲監臨官旁列兩觀察則提調監試也
紅艾香油紫花水都
隨蕤榜去遊仙當作桃符能避
鬼君不見賜緋容易報瓊難
比似胭脂畫牡丹想見白袍吟
立鵠仗伊綵筆去驂鸞

重九日作

迢遞茱萸節詩成晝掩關
曙袍秋白紵風帽舊青山已負持
螯興誰尋戲馬還家人怨行役
頻視鹿盧鐶

蕭條風雨夕歸夢幾徘徊
客舍柳三疊故園花兩開雁聲書
憶錦蛩語石侵苔何事蘇書記
天涯數舉杯

范秋門大令招飲寓齋不佞屬有河魚之疾至此一醉

而謬會將襪被東歸卽事報謝竝以誌別

市月浪浪聽雨聲酒人相見恰天晴采薪疾向樽前起折柳
詩當燭下成他日往還憑夢到經年聚散覺情生遲君西笑
長安道拈得花枝一手迎

燭影搖紅蠟又堆山膚水參淺深杯未妨食指連朝動直爲
中心永夕來刺史腸猶能惱亂將軍腹豈負追陪只應悔我
東轡掾想著鱸魚便要回

寄別他山

千金買寶刀古色繡難認一朝雌雄合餘劒器皆擯自我得
他山臭味欣相親戎幕接深談往往往燭至燼覈靈發書倉闕
靡諺筆陣如以刃解解如以泥印印憶昔春風場結客賞頗
慎矧在西南隅所見倘亦僅如何一杯酒見晚別偏迅秋禊

過春禊俛仰才一瞬墜歡不可拾離緒亂於髮始知良會難
良會天所吝昨聽杜鵑啼行李近霜信迢迢復迢迢此意無
從訊努力讀離騷西風吹兩鬢

留別疏雨觀察

北海曾陪醉酒筵西郊猶謝和詩箋一人知己當無恨萬里
從軍屬有緣忍爲鱸魚饒便去私因身身遠堪憐蒼茫細柳
斜陽路賸欲攀條一泣然

回首傾衿歲兩還班班車子入河間榮攷翠羽來雙闕威
建紅旌到百蠻十萬甲兵新虎節三千風月舊鼇山平生不
作殷勤語卻爲先生一破慳先生以翰林出守河間特旨
褒詢居官尋擢備兵費西當丈

之役生禽逆苗韋七結
鬚奉恩賞戴花翎

昨柯南去瘴雲屯金甲初銷玉壘存征戰曾隨寶車騎流凶

誰繪鄭監門借來河內從民欲薦作雲中念主恩我亦出
終思奏雅不關辛苦賦銷魂先生時以河郡舊失察事被吏議左遷當去中丞奏請暫留俟
代或諷早依北斗者不候獨謂典義善後先生宜獨任之是
以有寇恂魏尚之北深願公之肯念民難即所以不負主
知也臨別贈言冀
補聰明之萬一

疏雨先生屬題紅藥便面久而未報歲云暮矣驪駒在
門啟筭得筵率占二絕句錯書諸花間葉底既補畫之
不足且留情之有餘翦燭操觚爲之惆悵

懷袖朝雲瞥歲寒題詩容易別離難分明疊作陽關譜那買
胭脂畫牡丹

三杯藍尾舊豐臺觸忤春風一面來算得明年五陵道相違
正是此花開

登甲秀樓聞落葉

秋老四山空高樓落木叢鳥飛天過半風起樹當中人外炊
烟白年來戰血紅尙留王粲在瑟瑟賦飄蓬

圖畫關紀別

侵曉離亭唱鷓鴣雨絲風片最模糊一肩書劍從來慣滿眼
關山半語無昨夜酒樽猶北海明年春水又西湖送者多情
人誰解說相思者寫箇天涯送別圖

龍里夜宿欲雪

依舊來時路經年費往還采薇吟小雅折柳唱陽關山氣沉
風雨泉音奏珮環天寒應貰酒遠上白雲間

且向城中去蓬門爲我留風烟開茗椀雪壁亂鐙篝欹枕青
精飯吹簫紫綺裘果然十年事脈脈到心頭

雨行貴定道中

雪不能成雨又催雞聲惆悵馬徘徊輕裘壓霧濕偏重短褐
卷風寒自開孤唱尙聞泥滑滑遠行真見石累累人間好夢
知何限似我拋殘又一回

過清平縣

雨歇山旣晴縣在晴山裏仄徑草猶滋我馬時邈迤炊烟隔
簷白返照射城紫薄暮出南關谿壑何瀾瀾乃知山上雲卽
作山下水

大峰洞月夜

寒烟四圍中略有人家住築垣借近山支屋因老樹留客入
門來于時相語語是夕雨初晴月色冷成趣山禽肅肅然毛
羽白如鷺非謂白如鷺月色相映故倚戶憺忘眠題詩寄蒼
霧

黃平州

日落萬峰深風搖衆木陰城門吹畫角澗水答清琴橘熟香
傾市鴉歸凍選林鞞鞭尋逆旅孤負主人心

重過飛雲洞寄仁甫

暗泉涓涓流古洞洞口飛雲白如瓮我往之日雲相迎今我
來思雲亦送雲非昨日雲客是去年客客歸雲不歸飛去飛
來蕩無迹客休笑雲雲笑人雲卽是客客亦雲百年三萬六
千日間客年來年去羌何因去年看雲雲滿衣今年雲凍雲
不飛千山萬水歲聿莫夕鶻啼罷朝鳥啼山亦爲雲遮水亦
爲雲渡思公子兮雲外路可惜同來不同去指此空林片石
中與君舊坐看雲處

晚下相見坡書所見

轉嶺盤盤出迴谿派派分山腰高東日馬首下窺雲估客香
藜杖苗娘花布裙相思不相見一笑忽逢君

沙坪

沙坪東去路天色晚蒼蒼爲愛林嵐好都忘道里長澗聲喧
古瀑柳影臥朝陽隔塲涼風至時聞橘柚香

鎮遠憩中山寺書僧房壁

寺在最高層捫蘿附葛登半山間落葉一埕見疏鐙猿鶴諸
天梵龍蛇百尺藤自憐行腳久不及定中僧

蕉谿

夜泊梅谿關晨下蕉谿灘灘水羣飛石林立我船山沒於其
間灘師視灘若平地一灘一石皆能記輕車駟馬快曾經千
里豪釐出不意我聞天破以石補石破我船無處所安得西

尋蜀丁取石鑿東見海童將水犀乃有出門笑而無行路苦
雪夜泊玉屏山下

一山真如屏一霏真如玉繫纜玉屏山圍住天花宿來時青
壁罨紅霞歸去蕭條雪壓艤感此淹留變時物臥遺春夢先
還家

花將軍詩

貴州提督總兵官花連布帥藤甲軍征青谿苗所向
無敵旣而孤騎深入陣亾於落花坡蓋地讖也土人
歌花將軍云

臯端出火耳生風難向扶桑挂此弓橫草功名千古事落花
消息萬山中水聲鳴咽流殘雪土語函胡唱斷虹正是杜鵑
啼遍處春光九十太匆匆

芷江道中

行盡沅州路中央幾溯洄雪撐山骨立風打浪花開古屋神仙住空林鳥雀來烟波渺如此何處問湘纍

屈原

一部離騷卽楚風美人香草老詩翁恨他生及春秋後不得刪同鄭衛中十萬荆臺留宋玉八千奇字畔揚雄文詞何與人家國傾倒龍門太史公

黃獅灘

疇昔驚疑處重來膽未秋急流橫放槩飛渡倒移山下水人如夢前期歲又還猿聲啼斷處回首彩雲間

茉莉夫人鬼磨詞

夫人爲波斯匿王次妃鬼磨則頑石耳袁中郎遊德

山記云兩巒之間爲凹前則茉莉夫人鬼宮道也郡志引張三丰集茉莉元君謂卽夫人竝稱磨在竹林中宣鑒和尚德山參證時夫人以磨磨麵供養或以夫人卽諸天中摩利天所稱鬼子母胡竹巖引內典作詩駁之所謂素衣齋日香生絡息女宮中雪換肌者其言茉莉夫人一見瓔珞經一見法苑珠林而於鬼磨仍無著也舟過常德輒爲一詩紀之

王妃鬼母兩茫然辛苦中郎記一篇花好便開香世界石頑難結佛因緣五三福地誰能到六萬夫人只此傳若話鑒師參證跡竹林深處有寒烟

夜過青草湖作

香草不可拾湘波何處流西風吹落木嫋嫋一扁舟烟霧空

濛極魚龍寂寞遊君山山外月今夜曲如鉤

舟次長沙除夕

去向湘西泊江天正寂寥百年多萬里此地又今宵

歲壬寅自粵西

入都泊此度歲彈指十有六年酒熱雪猶影鐙寒風自挑詩情轉無賴待欲

續離騷

人聲喧極浦客路悵經年竹子平安寺柳條離別天歲華看
鏡裏兒女卜鐙前水漲孤舟起東風有杜鵑

屠維協洽

雨過湘潭縣

烟火十萬家家住春雨我欲問湘人湘水深幾許

淶口詠划子船

白沙赤岸中彷彿羅含記方便孟婆風吹轉船如戲誰知蕩

樂人悟得騎驢意

人日萍鄉道中

楚尾吳頭第一程
油衣不漏竹窗輕
車前尙少班瀾物
枕畔初辭欸乃聲
七日春風吹草綠
半山芳樹隔烟晴
自憎蹤迹多飄泊
愁聽靈謠古縣名

西邨

買得春江下水船
艚聲搖破暮江烟
擡頭瞥見瞿山月
挂在西邨邨那邊

江邨鎧火路蕭蕭
茆舍青旗一面挑
記取月明沽酒處
今年今夜是元宵

張公石

石在袁州江中相傳張果自海外攜來聞雞鳴墮此

故亦名張擔事誠不誕而石之奇可知

仙人夜半持山飛騎雲東海聞潮雞雲輕山重天門黑落水
無聲化爲石旣不可作上天梯亦不能爲中流砥勇者不敢
射顛者不得拜愚者不能徙且曷不爲巨鼃之戴與夫靈媧
之煉而但聞馮夷之夢天壓已仙乎仙乎爾何爲乎馭之以
朽索棄之若敝屣平泉良岳長已矣留此奇形恠狀在人間
使我莫得名其妙不復解其理夜來夢仙人一一詰其故當
年何處忽攜來此日何竟不攜去又如到此雞不鳴石不墮
公意欲將此物置何處且何所用作孤注毋乃齒黑時借以
醒殘酒飛飛蝠蝠精棲息劫灰後不然枕流漱石言偶訛石
破天驚事非有更或乘興擔來興盡歸釋此重負飄然走上
天入地一十二萬年至今有奇而無偶仙人大笑蒼蒼者天

頰首視石石亦不能言於是夢醒紀作詩一篇贈石呼石爲石仙石若有知應謝我并以此詩贈張果君不見抱璞者坎壈望夫者嬌娜黃石公白石郎不若茲之獨立常磊砢謂之支機石也可謂之飛來峰亦可

水碓行

不見杵臼但聞波濤隻輪調水孤亭誅茆爲其逸者忘其勞中有萬斛珍珠槽我從谿邊揚短舫涓涓軋軋清可聽杵聲細作水聲遠惟見兩岸春山青吁嗟乎種一頃田食無粟擁百城書住無屋賃廡而春計則迂帶經而鋤良所欲誠不如桔槔之俯仰屏風之屈曲徑須結廬傍谿宿豐年玉荒年穀以車代甍水代足夢回已是黃粱熟

鈴山堂作

此亦終南徑旁人說短長江流新樂府山色半閒堂玉壘三
邊市金甌一瓣香問天天不語終古老蒼蒼

丹詔空相擬青詞且未工爲誰書咄咄難遣唱匆匆文字緣
先盡功名事不終如何北山北失卻富家翁

菜花

好是扁舟倚夕陽綠波影裏菜花黃春風一月昌山峽只恨
無香似海棠

滕王閣

落霞秋水篇芝蓋春旗句婺女儷嫦娥亦見玉臺序文人相
沿習自古在昔然以彼咄嗟辦遂得永久傳爾時馬當山風
利不得泊偉餞發光誦氣壓臨江閣江神頗好事座客亦善
藏所作定不惡惜哉其稿亡始知古文章傳否皆偶爾敗興

感嬌客成名笑豎子依人非奇才依古非奇文所以蕭世子
不收王右軍

過鄱陽湖

蕩舟鼓蠡濱春水不成片譬如到匡廬不見匡廬面明沙繚
四圍細草量一線舟行且欲止水至亦未洊遲遲若轂推曲
曲如牀旋乃以十幅蒲易此百丈絳勞苦誠莫辭險難從茲
眷想當湖水平巨浸與天衍破浪乘長風不如此方便矧是
數載間吾遊亦云倦一身萬波濤皇天念貧賤百端何忒忒
回首看檣燕

象山懷古

龍虎山人吹鐵笛賣詵癡符作霹靂象山山人講學來藐姑
一笑傾雲臺吾黨讀書別義利門戶水火可捐棄不然白鹿

洞中言眼淚何曾有同異

象山始與朱子講論不合後在白鹿洞講君子喻於義一章聽者泣

下朱子亦謂其切中學者病根

紫陽之學無不醇金谿之學無不真卽如釋

迦與老子彼亦絕頂聰明人我意古人各有得刪除語錄割講席直從千載悵蕭條豈爲兩家通騎驛目論耳食徒紛然敢以後弊訾前賢若見桃花能悟徹請君去煮桃花喫

爛柯山爲王質觀棋處道書稱第八洞天舟過三衢偶爲一詩詠其事

兩童南北山一樵東西郭不知元黃戰惟見黑白落來時歲若駒歸去人如鶴柯爛斧猶存以鐵鑄此錯

嚴先生釣臺

銅馬功成玉馬走崇山幽都何可偶瑣谿釣在出山前嚴陵釣在歸山後高風繇邈有如此同學少年偶然耳加腹無端

見故人捋鬚乃欲臣老子仕宦當至執金吾娶妻當得陰麗
華人生貴賤各有志客星仙女成一家懷仁附義天下悅阿
諛順旨腰領絕將軍馬革卷黃沙南子羊裘飛白雪君不見
衡山李御榻白衣同臥起又不見淮陰韓背水而陣拋漁竿

江山船櫂歌

不住樓臺只住船一家一水一同年綠波開鏡低頭笑紅豆
安牀枕手眠

蘭谿女兒蕩蘭舟小語牙牙當舵樓故向鯉魚風下立碧綃
裙底一雙鉤

六柱船窗四面開布帆安穩下灘來箇儂七里瀧中住背指
東西兩釣臺

石筍游魚不寄書金華春酒就船沽妾心醉似金華酒郎意

空爲石筍魚

分明嫁與弄潮兒潮去潮來暗自知好便乘潮渡江去六和
埕下泊船時

杭州關紀事

杭州關吏如乞兒昔聞斯語今見之果然我船來泊時開箱
倒篋靡不爲與吏言呼吏坐所欲吾肯從幸勿太瑣瑣吏言
君果然青銅白銀無不可又言君不然青山白水應笑我我
轉向吏白百貨我無一卽有八斗才量之不能盈一石但有
萬斛愁賣之未嘗逢一客其餘零星諸服物例所不征君其
勿卻有一串飛青蚨贈君小飲黃公壚吏睨視錢搖手呼手
招樓上之豪奴奴年約有三十餘庸惡陋劣鬚有鬚不作南
語作北語所語與吏無差殊我且語奴休怒瞋我非胡椒入

百元宰相亦非牛皮十二鄭商人且非販茶去浮梁更非大
賈來瞿唐況不比西域之胡珊瑚木難璀璨生輝光問我來
何國但作賓客不作盜賊身行萬里半天下不記東西與南
北問我何所有笛一枝劒一口帖十三行詩萬首爾之仇敵
我之友我聞權酒稅不聞搜詩囊又聞報船料不聞開客箱
請將班超所投筆寫具陸賈歸時裘看爾意氣頗自豪九牛
何惜匹一毛爾家主人官不小豈肯悉索容汝暫況今尺一
除礦稅捐棄黃標復紫標監察御史開口椒爾何青天白日
鹿覆蕉奴聞我言慘不驕吏取我錢纏在腰斯時吏去奴欲
去檳榔滿口聲噤嚅彼噤嚅我歛乃見奴見吏如見鬼作歌
當經自懺悔轡軒使者采不采

余以乙卯歲花朝出門恰於己未歲花朝到家蓋四年

矣口占兩詩解嘲

幾從康了曾傷足猶喜歸兮未折腰寄語天公與地媼四年

萬里五花朝

乙卯閏二月

久欠花神祝嘏詞吟成束皙補亡詩珍珠密字買絲繡今夜問花知不知

今年不及入試四月二十日家人買題名錄來內子屏不予觀曰異日必爾乎取之得臣與寓目焉余感其意遂弗視也

江上鑼聲是好風吹殘閒夢曉匆匆孫山更在餘人外顧愷難傳阿堵中一紙螺烟書某某三年驢券別東東分明花院棋聲閉此局全輸太惱公

甌破明知計不諧璞完猶可取諸懷正愁此事終難免得似

卿言亦復佳但使彈棋留有局未妨沽酒拔無釵翻身眠過
三竿日絕勝年年與吏偕

歸白金筑沈松廬觀察以書來問并寄示所撰春秋詠
史詩序他日奉訪南湖未值返棹有懷作此呈謝

兩年月帳視刀鐙又綠東君隔岸山書附鯉魚連夜至春隨
遊子一時還消磨瘴癘諸天外飄泊文章百戰間古錦香囊
仍好在新詩句句待公刪

采薇相戒采蘭詩雲白山青夢見之心事陽城歸計急功名
鄧禹笑人遲風塵騎馬歌三疊星月棲身借一枝賴奉慈顏
報安健六霜慙負草堂貲

借住南華橋屋今已六年屢致賃
直先生輒復見還而歲時轉有周

贈余
家者

迢遞東吳萬里船琴書情話動經年更無好字題凡鳥賸有

春心託杜鵑湖上鶯花修禊候城中楊柳禁烟前棹歌聲唱
斜陽樹咫尺離懷更惘然

千秋青史一風鐙商略微言感廢興門外牛車逢沈約枕中
鴻烈乞徐陵書參兩傳名原癖紙序三都價可增若擬鐵厓
新樂府不妨大笑似蒼蠅

蜘蛛蝴蝶篇

蜘蛛結網誘青蟲桃花飛入怨東風蝴蝶尋花尾花往打盡
桃花同一網蜘蛛不語蝴蝶愁絲絲羅織桃花囚桃花隔霧
看蝴蝶可似天女逢牽牛瀟瀟春雨當窗入沾泥花片胭脂
濕蝶粉蜘蛛絲一劫灰青蟲自向牆根立

蘇州書贈王仲瞿

抱琴曾未訪成連投劍何因薦戴淵破柱驚留王導在覆巢

危竝孔融顛梁鴻杵臼容偕老賈誼文章誤少年若使庾郎
能作賊爭教謝客不生天

已聞裴度平淮蔡更遣何戴唱渭城黃絹碑陰楊德祖絳紗
帷後鄭康成韓非畢竟難同傳殷浩當時有盛名但使入吳
周處好不須難蜀相如行

徐琢珊秀才邀遊獅子林作

到此洞門開不覺俯而入小山宮大山風雨通呼吸仄徑蟻
曲穿幽巖蟲漸蟄低引一泉流險鑿四壁立何殊循牆走頗
欲擇木集百轉百邛壑一步一階級縮地無近謀滿天有餘
濯雲林老畫師筆筆不相襲凝神慘經營彈指妙結習獅以
石粼粼龍以松粒粒咫尺頃刻間爾我不暇給入山何必深
入林何必密

白桃花詩

施朱太赤宋牆東一笑三年色是空
不記紅塵前度事相逢
素面此門中弄來粉鏡能霏雪
夢到瑤臺欲避風願借神仙
舊丹枕替他安放水精宮

似聽吳娘白紵詞玉簫聲裏最相思
華綃句好誰能想獼髓
痕多未許醫三月飄零沾柳絮
一錢羞澀買胭脂重來劉阮
天台路贏得佳人鬢有絲

蔣廷宣表兄州新疆賜環余適歸自南詔相遇於吳門
道上索詩爲別

執手長衢大粲然市人驚笑客人顛
宰官身現功名劫遊子
吟留道路緣踏破腳根難著地
掀開鼻孔去撩天夜闌秉燭
從頭數不信匆匆廿四年

石頭巷裏賦停雲鐵索橋邊弔夕曛未必吹簫能乞食也曾
投筆去從軍著書歲月閒中誤讀曲家山念後分又是蕭晨
掉船去落花時節正離君

虎邱白公祠作

畫船搖出路三叉春在蘇州刺史家只此山塘常自占不須
州宅更相夸左司香火詩誰替隔岸園林酒竝賒絕勝潯陽
江上別使君夜夜聽琵琶

冰山曲

絢我冰蠶絲彈作冰山曲狐首濡時蠱未知虎尾圖成貂不
足初隸羽林籍旋領司農轡一戰未收回紇馬十年先插侍
中貂用普半部長試鯨九載恨競投事後絕交書罕著同時
辨姦論塞翁初失馬葉公頗好龍南園酒熟鉗齒皺東閣天

寒布被蒙誰吟溫八又且書朱萬拜舞罷璿瑜側帽簷歌成
栲栳吹裙帶朝登樞密院暮入溫柔鄉狎客春愁一池水相
公秋興半閒堂不問天陰晴能令公喜怒自將歌曲換中書
或奉緡錢求節度門前火馬望階下禿鶯啼才子文章因狗
監先生家世本牛醫心病無時無腳氣有時有爲向陳倉訪
碧雞早從上蔡牽黃狗奪園過沁水開第傲汾陽始從何晏
拜都尉別遣王敦鎮武昌欲唱留花門難教返蔥肆忽看定
遠無還期翻慨少游多大志紅日長安近青天蜀道難不須
籌筆驛前去且向凌烟閣上看輔臣不相能債帥亦屢改幸
無黨禍起珠厓大有軍情馳玉壘白蓮花未落青苗法不行
天下安危注宰相中年哀樂誤蒼生痛攀鼎湖龍淒聽華亭
鶴少正聞人宣聖誅共工罪狀重華暴不知摧霹靂猶自畫

葫蘆祇道三年攝篆宰直將一紙縛庸奴不必獨柳邊不必
木棉內但從竈下養中郎安得山頭望廷尉椒香元載宅花
濺石崇衣打開磁枕黃梁熟脫下麻鞋白練飛乃出四夫人
遂竄八司馬香殘心字無留痕淚墮臍鐙不盈把今日水中
蟹昔日屋上烏問價可應奴倍婢占繚還有姪從姑額額視
淫朋哀哀負阿母會教相見及黃泉并少同歸惟白首路十
終難老鄭五真無人棹成空鑿三年石扇舉難遮十丈塵半
生千載憂一死萬事足生當有癖敲王戎死竟無詩嫁韓偓
銅山有時傾玉山有時積盡償髮怨絲恩了終見乾啼濕哭
來